

誠齋詩集

冊三

欽定四庫全書

楊文節公詩集卷之十二

宋吉水楊萬里廷秀甫譔

長陽後學彭 淑秋潭甫校訂

本邑後學趙本漢漱雲甫全校

荆溪集

鬻醬

忽有瓶罌至捲將江海來  
玄霜凍龜殼紅霧染珠胎  
魚鮓兼鰕鮓奴才更婢才  
平章堪一飯斷送酒三盃

池冰二首

池底枯荷瘦不勝池冰新琢玉  
壺凝如何留到炎蒸日  
上有荷花下有冰  
怕寒不敢上高臺上得高臺急急回  
日欲消冰風不允天猶未夕月先來

節日新晴歸自天慶

初日明鴈腹酸風迎馬頭如何一雨過  
添却滿城秋樓觀色俱喜槐榆影獨愁  
節中公事少吏散得吾休

城上野步用轆轤體

風勁無遺暖晴行失老懷葉飛楓骨立萍盡沼奩開路好仍回首泥殘敢放鞋  
登臨不須盡留眼要重來

晴眺

野意隨宜有山光入望無寒曦不自暖落木幾曾枯不分霜前樹長啼月下烏  
苦吟徐便悔可惜數莖鬚

霜曉

霜重曉方覺日高融始寒空牆半根濕落葉片聲乾

晚興

老來懷抱向誰開歲晚無花薦一盃處分新霜且留菊辟差寒日早開梅只教  
詩句清如雪看得榮名細似埃管葛諸人端解事也曾遭我笑渠來

暮寒

過鴈雙仍急寒鴉隻已多絕憐晴色好無奈暮寒何眼病書休讀心勞句尙哦

老生窮事業此外豈無他

酒蛤蜊

飲者憐渠有典刑見渠借箸眼偏青平生閉口不論事晚歲搜腸求獨醒

蒲桃乾

涼州博酒不勝癡銀漢乘槎領得歸玉骨瘦來無一把向來馬乳太輕肥

梨

掛冠大谷肯于時釘坐風流特地奇骨裏馨香衣不隔胷中冰雪齒偏知買漿碎搗瓊爲汁解甲方憐玉作肌老子醉來渾謝客見渠倒屣只嫌遲

蠟燭

未夜身先臥不春花已開泣殘雙淚雨愁得寸心灰

小立淨遠亭

清景無終極頻來未屬厭遠山秋後出茅屋近來添

新晴曉步

冬來莫莫雨絲絲竹徑梅坡迹頓稀作意新晴聊一出行逢濕路却成歸

探梅

春傍梅梢瘦處回小花未忍折將來却緣久住成幽事剩看南枝一度開

和王司法雨中惠詩二首

絕憐法曹三尺喙不辦太倉五斗米胡奴走送今寂然公路如何令至此春花秋月千首詩一字不曾堪療飢黃獨已空鑱底用玉徽凍脫琴爲炊窮鬼偏隨天下士再結柳車君但試不應滿腹貯六奇豈有逐貧無一計

詩中哀怨海樣深青燈搔首夜沉沉一尊往慰風雨晚莫管帶圍寬一眼無那詩愁着暮人風顛雨急更昏昏登臨無地可散策剝啄阿誰來叩門安得與渠呼玉酒醉餘同看落金盆齋廚索寞如懸罄慙媿酸寒遣一尊

惠泉酒熟

敲冰汲山泉炊玉釀霜醅忽然酒成泓失却瓊作堆抱甕輸竹葉挈瓶注銀盃銀盃不解飲傾瀉入我懷酒聖凡五傳道統到吾儕誰云孟氏醇軻死不傳來



醉鄉天張幕糟邱麴爲臺吾欲往相宅今夕未擬回

晝倦

愛日熏人欲睡昏自勻嫩火炷爐熏蜘蛛已去惟存網猶冒窗間一隻蚊

戲題水墨山水屏

櫂郎大似半邊蠅摘蕙爲船折草撐今夜不知何處泊浪頭正與嶺頭平

以糟蟹洞庭柑送丁端叔端叔有詩因和其韻

斗州只解寄鵝毛鼎肉何曾饋百牢驅使木奴供露顆催科郭索獻霜螯鄉封萬戶只名醉天作一邱都是糟却被新詩太清絕喚將雪虐更風饕

曉坐

曉拂文書已罷休却披詩卷散閑愁只驚兩眼生光彩日到東窗半角頭

凍蠅

隔窗偶見負暄蠅雙脚掙拏弄曉晴日影欲移先會得忽然飛落別窗聲

壕上書事

十里長壕展碧漪波痕只去不曾歸鷺鷥已飽渾無幹獨立朝陽理雪衣

霜

天欲吹霜不作難連宵也費許多寒新裝瓊甲爲蔬甲仍化朱欄作玉欄

冬至前三日

故山千里幾時回又見初陽動琯灰酒不逢人還易醉詩如得句偶然來

鴉

樺子相看只笑渠老夫亦復小盧胡一鴉飛立鈎欄角仔細看來還有鬚

朝飯罷登淨遠亭

近水孤亭迥縈城一徑斜霜林烏鵲國冰岸鷺鷥家殊覺冬曦暖還拈小扇遮  
傳呼惠山水來淪建溪茶

近節

節裏非無事忙中自有閑因風煩白鳥折簡喚青山詩卷一兩冊齋房三四間  
興來長得句却道在塵寰



冬至日歸自天慶觀二首

逗曉清寒未苦嚴，輕霜隨分點茅簷。  
霧中失却溪邊寺，不見浮屠只見尖。  
節裏人家笑語饒，日高猶自燭花交。  
霜林遮眼八九葉，露竹出牆三四梢。

蠟梅

栗玉圓彫蕾，金鐘細着行。  
來從真蠟國，自號小黃香。  
夕吹撩寒馥，晨曦透暖光。  
南枝本同姓，喚我作他楊。

蜜蜂底物是生涯，花作餽糧蠟作家。  
歲晚略無花可採，却將香蠟吐成花。  
眉間蜜酒發輕黃，對着詩人不惜香。  
金作仙衣元自冷，月中仍帶一身霜。  
蒼頭元不是花房，融蠟熬酥戲滴漿。  
忽見微舒金爪甲，不知中有紫香囊。  
江梅珍重雪衣裳，薄相紅梅學杏裝。  
渠獨小參黃面老，額間艷艷發金光。

霜寒輓轡體

滴地酒成凍，喧天鴉訴寒。  
窗風經怒響，簾日漏溫痕。  
偶爾尋梅去，其如駐屐難。  
沙鷗脚不韞，故故踏冰翻。

今曉難離火平生不擁爐只緣青女降便與管城疎淡日明還暗微暄有似無  
誰能忍寒得苦死去看書

苦寒

畏暑長思雪繞身苦寒却願柳回春晚來斜日無多暖映着西窗亦可人  
添盡紅爐着盡衣一盃方覺暖如癡人言霜後寒無奈春在甕中渠不知  
冰和菜把菜和冰心喜冬殖齒却憎且忍牙車寒一點教他胷次雪千層

晚晴獨酌

冷落盃盤下箸稀今年淮白較來遲異鄉黃雀真無價稍暖瓊酥不得時  
霜熟寒輕際晚時簾間過影一鴉歸夕陽端與誰爲地只照游塵絮樣飛

城頭曉步

古城秋後不勝荒人跡新行一逕長竹影已搖將午日草根猶有夜來霜  
城東行遍却城西欲問梅花乞一枝雪糝久團霜後朵嗔人頻看故開遲

送丁牧仲新除奉常寺簿入朝

帝念潛龍雪邸臣，寵光玉樹照青春。  
家藏履舄星辰舊，天借旂常日月新。  
從此雲霄君穩步，向來鷁鷺我曾鄰。  
曲臺簿正多廊廟，西府璇樞是一人。  
今樞密錢公嘗爲奉

贈節推學士

奏篇驚倒漢廷臣，一眼元無四海人。  
天下無雙聊小却，洛陽年少是前身。  
雲鵬飛上偏嫌早，霧豹深藏更幾春。  
寬作十年相見着，剩將風雪試松筠。

懷古堂前小梅漸開四首

梅邊春意未全回，淡日微風暗裏催。  
近水數株殊小在，一梢雙朵忽齊開。  
生愁落去輕輕折，不怕清寒得得來。  
腸斷故園千樹雪，大江西處亂雲堆。  
隨意行穿翠篠林，暗香撩我獨關心。  
遙看小朵不勝好，走近寒梢無處尋。  
未吐誰知膚底雪，半開猶護藥頭金。  
老來嬾去渾無緒，奈此南枝索苦吟。

絕艷元非着粉團，真香亦不在鬚端。  
何曾天上冰玉質，却怕人間霜雪寒枝似。  
去年仍轉瘦花於來歲，定誰看老夫官滿梅應熟。  
齒軟猶禁半點酸。

揀得疎花折得回銀瓶冰水養教開忽然燈下數枝影喚作窗間一樹梅歲律又殘還見此我頭自白不須催相看姑置人間事嚼玉餐香燕一盃

雪中登淨遠亭四首

犯雪來登淨遠亭飛花着水旋成冰瓊田萬頃珠千樹真在瑤臺十二層  
數片初飛點砌苔須臾不覺玉千堆去年無雪非無雪留作今年一併來  
壕水深清一鏡如天傾瑤屑打成酥瑠璃缸面熬瓊粥釀出珠宮白玉腴  
忍却清寒得得來不堪騎吏苦相催鴈穿銀色界中去人到水晶宮裏回

和趙鼎輔府判投贈賀雪之句

登城放目雪光中萬水千山一色同逗曉月華猶在地未春柳絮已隨風忽傳  
別駕贈佳句道是頻年當屢豐撚斷冰鬚愁寡和玉花飛繞正濛濛

觀雪二首

銀屋瑤堦頃刻成緩飄急洒總無聲屑雲作粉如何濕琬玉爲花乃爾輕空裏  
仰看元不見日光未透不妨晴滿庭更遣遲銷着剩借書窗幾夜明

坐看深來尺許強偏於薄暮發寒光半空舞倦居然嬾一點風來特地忙落盡  
瓊花天不惜封他梅蘂玉無香倩誰細撚成湯餅換却人間煙火腸

和吳寺丞喜雪

珠唾銀鈎贈一通炯如密雪墮寒空飛來數片不霑袖剪出六花全是風骨冷  
魂消殘醉裏日光玉潔晚晴中先生秀句今無敵誰送相如奏舜瞳

雪晴

銀色三千界瑤林一萬重新晴天嫩綠落照雪輕紅兒劣敲冰柱身清墮藥宮  
何須師鮑謝詩在玉虛中

晴後雪凍

負暄尙覺日無功炙手仍愁火失紅本是雪前風作雪却緣雪後雪生風四郊  
凍合如相約七日晴來不肯融舊說醉鄉堪避暑避寒也合此鄉中

和丁端叔喜雪

天將一雪淨乾坤便恐湯泉亦不溫瑤草忽生無種子梅花寒損要溫存清游

未到先回棹高臥何如且閉門珍重故人貽妙語追還正始最初元

雪凍未解散策郡圃

積雪偏工霽後凝不妨冷極不妨清靜聞簷滴元無雨倒挂冰牙未怕晴獨往  
獨來銀粟地一行一步玉沙聲圃中散策饒君強敢犯霜風上古城

雪後十日日暖雪猶未融

地凍雪起立簷生冰倒垂日穿銀筍透風琢玉山軟今曉還差暖清寒退尙遲  
生愁便銷去將底伴銀髭

殘雪

殘雪堆成山數重懸崖幽竇玉玲瓏如何借得仙人掌擎取瓊瑤三四峯  
多稼亭日色甚暖忽有雪數片自晴空而下已而復無

霽日何曾惹寸雲忽飛些子雪如塵不知底處天花落風裏吹來數點春

兒啼索飯

飽暖君恩豈不知小兒窮慣只長飢朝朝聽得兒啼處正是炊梁欲熟時



寒雀

百千寒雀下空庭小集梅梢話晚晴特地作團喧殺我忽然驚散寂無聲

晚眺

晚暖好登臨吾衰也不禁雪殘千嶂玉日落萬梢金

雪夜候迎使客

六花不放一塵生晴後猶餘十日凝新月未光輸與雪夜風儘冷只留冰候迎  
銀漢槎頭客挑盡玉蟲窗下燈紙帳蒲團地爐暖自憐不及草庵僧

燭下梅花

燭下一枝梅欲開猶未開渾如玉冠子戴月上瓊臺

窗外雪猶凍瓶中梅不開燭花將煖氣催得早春回

燭下瓶中江蠟二梅

江梅蠟梅同日折白晝看來兩清絕如何對立燭花中只見江梅白於雪

使客不至夜歸獨酌

使客夜不至還舍欣小歇盃盤只草草足可相煖熱庭前雪夜明道是簾外月  
及見盤中酥喚作庭前雪

謝趙行之惠霜柿

紅葉曾題字烏裨昔擅場凍乾千顆蜜尙帶一林霜核有都無底吾衰喜細嘗  
慙無瓊玖句報惠不相當

謝葉叔羽總領惠雙淮白

寶奩寡貢笑權臣筠擔分甘荷故人天下衆鱗誰出右淮南雙玉忽嘗新未知  
丙穴果何似只恐子魚無此珍敢遣腹腴勸年少一盃端合壽吾親  
情知此味飲中瓌暖律何緣到死灰去歲海紅猶間識今年淮白不曾來一寒  
尙有綈袍贈雙鯉仍隨尺素回厚祿故人書盡絕只餘計相解相哀

詠酥

似膩還成爽纔凝又欲飄玉來盤底碎雪到口邊銷

送客歸登淨遠亭二首

犯寒送客只勞神上到危亭眼頓新雪汁滴人清入髓莫將衫袖障頭巾  
池冰動處水生瀾未覺今朝抵死寒便恐雪銷難再得不辭鞋濕數來看  
和范至能參政寄二絕句

生憎鴈鷺只盈前忽覽新詩意豁然錦字展來看未足玉蟲挑盡不成眠  
夢中相見慰相思玉立長身漆點髭不遣紫宸朝補袞却教雪屋夜哦詩  
臥治齋夜坐

今年一雪徧江淮半月晴光凍不開孤坐郡齋人寂寂一枝紅燭兩瓶梅  
十一月二十八日雪至十二月十一日日色方暖積雪始融

日華今日始微暄次第梅花暖更妍只有樹陰偏得意占他殘雪不還天  
穉子弄冰

穉子金盆脫曉冰綵絲穿取當銀鉦敲成玉磬穿林響忽作玻璃碎地聲

寄題石湖先生范至能參政石湖精舍

萬頃平湖石琢成尙存越壘對吳城如何豪傑干戈地却入先生杖履聲古往